

MIŠLJENJE

po Zahtjevu privrednog subjekta AT Kerametal d.o.o. Ljubuški

**Sarajevo
Oktobar, 2022. godine**

Broj: 01-26-7-016-4/22
Sarajevo, 12.10.2022. godine

Konkurencijsko vijeće Bosne i Hercegovine, na osnovu člana 25. stav (1) tačka f) Zakona o konkurenciji ("Službeni glasnik BiH", br. 48/05, 76/07 i 80/09), a po podnesenom Zahtjevu za davanje mišljenja privrednog subjekta AT Kerametal d.o.o. Ljubuški, Vitinska 70, 88320 Ljubuški, Bosna i Hercegovina putem advokata Ivana Hercega iz Ljubuškog, Vukovarska ulica 22, 88320 Ljubuški, Bosna i Hercegovina, zaprimljenog 30. juna 2022. godine pod brojem: 01-26-7-016-1/22, na 110. (stotinudesetoj) sjednici održanoj dana 12. oktobra 2022. godine, donijelo je

MIŠLJENJE

Privredni subjekt AT Kerametal d.o.o. Ljubuški, Vitinska 70, 88320 Ljubuški, Bosna i Hercegovina je Konkurencijskom vijeću Bosne i Hercegovine (u daljem tekstu: Konkurencijsko vijeće) putem punomoćnika, odvjetnika Ivana Hercega iz Ljubuškog, Vukovarska ulica 22, 88320 Ljubuški, Bosna i Hercegovina (u daljem tekstu: Podnosilac zahtjeva ili AT Kerametal d.o.o.), dana 30. juna 2022. godine pod brojem: 01-26-7-016-1/22, dostavio Zahtjev za izdavanje mišljenja (u daljem tekstu: Zahtjev), u skladu sa članom 25. stav (1) pod f) Zakona o konkurenciji ("Službeni glasnik BiH", br. 48/05, 76/07 i 80/09 – u daljem tekstu: Zakon o konkurenciji ili Zakon).

Podnosilac zahtjeva u zaprimljenom podnesku, uz pripadajuću popratnu dokumentaciju, navodi sljedeće:

- Privredni subjekt KJKP „Rad“ d.o.o. Sarajevo, Paromlinska 57, Sarajevo (u daljem tekstu: „Rad“ d.o.o.) dostavlja nezakonite račune privrednom subjektu AT Kerametal d.o.o. Poslovna jedinica Ilidža, Rakovička cesta 88, Ilidža, Sarajevo (u daljem tekstu: AT Kerametal d.o.o. PJ Ilidža), u enormnim mjesečnim iznosima, a isti su pravno manjkavi i u odnosu na Podnosioca zahtjeva ne mogu proizvoditi pravne učinke;
- Visina ispostavljenih računa od strane privrednog subjekta „Rad“ d.o.o. nije ista za sve poslovne subjekte u Rakovičkoj cesti, Ilidža, Sarajevo, odnosno nisu primijenjeni isti kriteriji za sve poslovne subjekte u navedenoj ulici, čime je grubo narušen princip pravne sigurnosti i neusklađenost rada navedenog poduzeća sa zakonom i pozitivnim zakonskim propisima, te čime je privredni subjekt AT Kerametal d.o.o. doveden u neravnopravan i diskriminatoran položaj u odnosu na druge poslovne subjekte u okruženju;
- Visina mjesečnih iznosa računa iznosi po cca 3.961,00 KM, prilikom čega privredni subjekt AT Kerametal d.o.o. PJ Ilidža uopće ne koristi usluge privrednog subjekta „Rad“ d.o.o., te su ispostavljeni računi pravno potpuno neutemeljeni i ništavni, te kao takvi, vraćeni su isporučitelju računa;

- Nakon brojnih upozorenja od strane privrednog subjekta AT Kerametal d.o.o., koji je u prigovorima detaljno navodio sve nezakonitosti, privredni subjekt „Rad“ d.o.o. je nastavio sa praksom, bez da su valjano obrazložili i osvrnuli se na prigovore da su izdani računi pravno neutemeljeni, odnosno da isti ne mogu proizvoditi pravne učinke u odnosu na privredni subjekt AT Kerametal d.o.o.;
- U naprijed navedenim prigovorima je, između ostalog, isticano da su sporni računi protivni Ustavu Federacije Bosne i Hercegovine, član II.A.2 (1) c koji pretpostavlja da sva lica na teritoriji Federacije Bosne i Hercegovine uživaju pravo na jednakost pred zakonom (član 7. Opće deklaracije o pravima čovjeka), te je također napominjano da su ovakvi računi u suprotnosti sa odredbama člana 2., 3. i 7. Zakona o zaštiti potrošača u Bosni i Hercegovini, na što su se isti oglušili;
- Temeljem Zakona o pristupu informacijama, od privrednog subjekta KJP „Rad“ d.o.o. je traženo da dostavi sve račune poslovnih subjekata u Rakovičkoj cesti, radi daljnjeg postupanja i uvida u naprijed navedeno, dok isti traženu dokumentaciju nikad nisu dostavili;
- Privredni subjekt „Rad“ d.o.o. Sarajevo, unatoč tome što su dostavljeni računi nezakoniti i nemaju pravno niti činjenično pokriće jer privredni subjekt AT Kerametal – PJ Ilidža uopće ne koristi njihove usluge, nema kante za otpad niti isti proizvodi – što je sve navedeno u prigovorima, te unatoč tome što su svi originalni računu vraćeni privrednom subjektu „Rad“ d.o.o., nastavlja dostavljati nezakonite račune privrednom subjektu AT Kerametal d.o.o. PJ Ilidža.

Na osnovu naprijed navedenog, Podnosilac zahtjeva traži mišljenje Konkurencijskog vijeća o zakonitosti računa koje izdaje privredni subjekt privrednog subjekta KJP „Rad“ d.o.o. privrednom subjektu AT Kerametal d.o.o.

Član 1. Zakona o konkurenciji propisuje da se istim uređuju pravila, mjere i postupci zaštite tržišne konkurencije, nadležnosti i način rada Konkurencijskog vijeća na zaštiti i promociji tržišne konkurencije u Bosni i Hercegovini.

Članom 4. st. (1) i (2) Zakona propisano je šta predstavlja zabranjene sporazume, na šta se isti odnose, odnosno koji zabranjeni sporazumi su kao takvi ništavni u smislu odredbi Zakona, dok je članom 4. stav (3) Zakona propisano kada i pod kojim uslovima sporazumi iz člana 4. stav (1) nisu zabranjeni.

Članom 9. st. (1), (2) i (3) i 10. st. (1) i (2) Zakona propisano je kada privredni subjekti imaju dominantan položaj na tržištu, odnosno šta predstavlja zloupotrebu dominantnog položaja jednog ili više privrednih subjekata na relevantnom tržištu, te na šta se ista odnosi.

Imajući u vidu zaprimljeni Zahtjev Podnosioca zahtjeva, Konkurencijsko vijeće naglašava da se eventualna postojanja zabranjenih konkurencijskih djelovanja utvrđuju u postupcima koji se vode pred Konkurencijskim vijećem, na koji način je jedino i moguće utvrditi povredu Zakona o konkurenciji, te se mišljenjem ne može dati ocjena o postojanju istih niti cijeliti zakonitost određenog ponašanja privrednih subjekata. Odnosno, podneseni zahtjev za mišljenje u odnosu na konkretnu poslovnu aktivnost se ne može razmatrati u smislu odredbe 25. stav (1) pod f) Zakona o konkurenciji. Takvo postupanje ovog organa predstavljalo bi pravnu pomoć u konkretnom slučaju što nije smisao navedene odredbe.

Ovo mišljenje se temelji na podacima iz Zahtjeva, te ukoliko isti odstupaju od stvarnog činjeničnog stanja, ne može se primijeniti.

Predsjednik

Nebojša Popić

Dostaviti:

- **Podnosiocu zahtjeva, putem punomoćnika**
- **Arhiv**